

四庫全書

集部

欽定四庫全書

西菴集卷四

明 孫賚 撰

七言古

閨中聞子規

交疏日射房櫳曉碧樹初聞子規鳥
驚回殘夢了無歡
慘切春愁破清悄獨宿何曾下繡幃
寧勞勸我不如歸
鶯花爛漫江南道好向遊人醉處啼

晚發英德

山城斗大臨江橫數椽茆屋炊烟青炎風吹林桂花落
斜日倒影滄江明滄浪萬頃舟如葉舟子齊橈歌激烈
一篙新水靜悠悠今日江頭雨初歇

贈端孝思

端郎白皙如冠玉葩辭麗藻撐滿腹生來未作九品官
聲價蚤已驚流俗阿翁舊日尚書郎出領方鎮專衡湘
掖垣休暇會賓客冠帶楚楚盈華堂憐君三十猶未娶

却向窮簷守章句紛華滿目何足云昔者炎門今不遇
楊花三月石城西翠袖紅裙滿大堤良辰歡笑暫行樂
永夜索寞猶孤棲興來呼酒秦淮屋宣州雪梨如碧玉
坐中北客為燕歌歌得前朝數般曲看君顏面人中英
暫時遜縮非避名鳳雛未必老丹穴謝安亦豈忘蒼生
玉堂學士龍門叟日日談君不容口振翮青雲諒匪遙
與君且盡杯中酒

贈高彬

高彬魁梧身七尺秀眉豐頰仍廣額幾年共食越江魚
此中同作鍾陵客鍾陵上國要路津出門大道連青雲
交遊脫畧舊時輩拜揖盡是英豪人少年一字都不識
近日能詩兼讀易看君意志肯如此世人見者誰不惜
平生於我最知己旅邸浮沈托生死得錢慷慨即相贈
歸家不問妻與子玉壺美酒桃花春酣歌每到清夜分
衝人俠氣儼郭解不信窮愁如有神人生窮達何足道
微名於世須亦早但憐零落故山雲未得相從逐幽討

送何三元帥北上

春風吹花江水波江頭楊柳綠差差臨歧送別增慷慨
我與何郎情最多何郎昔年十六七明珠虎符光照室
錦臂蒼鷹掣暮雲青絲白馬嘶晴日此時我作座上賓
星樓月帳長相親班超英傑恥投筆孫楚兀傲猶參軍
何郎嚴親初入覲何郎笑解封侯印鵲血弓弮滿壁懸
青門瓜地從人問今年會晤蔣陵西爛漫鶯花醉欲迷
梧桐葉落鳳臺曲楊柳烟籠白下堤何郎於我情最厚

此別寧堪酌春酒平原北上路迢迢白雁南還寄書否

題昭陽草堂手卷為增城縣丞謝英賦

太傅風流一千載烏衣朱雀今誰在何時文水見文孫
玉樹亭亭繼光彩茅茨還枕小東山山下銀溪玉作灣
不獨澄江淨如練金屏想像如花顏陂塘別墅恣情適
蕩漾寒波映空碧隱隱疑聞蠟屐聲青青似帶羅裙色
羅裙翠帶總相宜君家兄弟況能詩細雨蛙聲來坐席
淡雲疎影落漣漪南陔作郡無復意那更旁人知許事

訟庭窄狹臨溪水日倩鷗羣伴清致清夢迢迢若箇邊
鳴蜩初變柳盈園詠歌未必慚康樂俊秀真堪比惠連
惠連別來年歲久夢裏知能相見否且停憶草遠生愁
便可巡池酌春酒伯仲聯翩珪組才聲名遠播鳳凰臺
暫時分手何有哉行當聯袂赴青瑣莫學柴桑歸去來

題高彬白雲山房手卷

高彬昔年喜學武七尺長軀力如虎往昔追強過營門
日來從戎事藩府錦袍白馬鐵連錢騎將校獵城南邊

鼻頭火發不知熱耳後風生猶著鞭秦楚山川歲華改
萬人零落惟彬在腰間不插黃金符却向詞林學文彩
白雲遠在藩府陰彬馳匹馬恣幽尋秦臺古樹掛秋色
遶澗流泉清客心娛遊日夕歡不足更傍山腰結茆屋
多種琅玕引鳳凰大開閒徑邀麋鹿雨龍歸洞白雲門
駿韃綿聯窻戶間月映餘輝長不夜雲拖晻靄似巫山
山中白雲如白石高彬與雲同枕席雲來萬樹似開花
雲去千岩同一色何年作客帝王州却按新圖憶舊遊

紅樹不知淮水晚白雲遙認故山秋故山白雲長自好
且莫看雲被山惱他年謝病解朝衣我亦從君拾瑤草

會鄉友

京城客至沽新酒旅邸蕭條百無有秦淮釣得槎頭鱖
旋學吳中膾魚手此時懷抱對君開況有同門故舊友
醉裏時忘蔣陵道夢中猶記越王臺

送張仲庸歸陝西

虹亭臘月天欲雪洪州旅客歸心折秦關遠在黃河西

行李蕭蕭待明發憶昔長安全盛年君騎白馬錦鞍韉
五陵花月映紅袖京兆春風搖玉鞭年光去去如流水
華髮棲遲簿書底却隨征鴈向南雲三載離家數千里
浮雲往事復誰論近喜天書出午門垂簾事簡得休暇
歸訪商顏山下村臨歧送君飲君酒五女峰頭握君手
壯君行色百無有明年二月君到家寄聲為道平安否

送高文質遊杭州

君昔從戎佐南伯歸朝名在駢騎籍有兒截鎗能跨馬

請官得應長番役錄華三月帝皇州馳道千花過紫騮
豪俠應憐白日晚狹斜還作少年遊玉瓶一雙和酒絡
九陌三衢縱歡譁白雪駟兒翠毯鮮石榴裙子春紗薄
今晨告我武林行一束圖書畫舸輕賓客追隨白下里
鶯花明媚石頭城蘇堤雨餘春水長三高祠下聞漁榜
冷泉濯足乘風歸野寺哀猿共僧往可憐雲水空西湖
畫船邇來一隻無沈酣久矣厭流俗清冷正可娛潛夫
武林舊日豪華國一一煩君弔遺跡明朝白馬擁波濤

前代銅駝卧荆棘銅駝翁仲事應非惟有孤山似去時
君行若過逋仙墓折取梅花一兩枝

異橘圖

憲郎高隱林泉日種得江南幾株橘春日熒熒吐瑞花
秋風磊磊懸嘉實去年起作京華遊臺端六月如九秋
烏啼翠栢玉柯冷鶴唳壁山琪樹愁歸來風景慰吟目
依舊餘陰蓋書屋萬顆重垂丹井黃千頭再結龍洲綠
綠映紅稀壓四鄰洞庭隱映波粼粼義之帖就霜凝筆

巴叟棊敲香滿身廣文有才過屈宋解撰王孫楚聲頌
煩君採摘籠白鷺載酒談玄作清供

白雲山

白雲山下春光早少年治遊風景好載酒秦佗避暑宮
踏青劉鋹呼鸞道木綿花落鷓鴣啼朝漢臺前日未西
歌罷美人簪茉莉飲闌穉子唱銅鞮絲華往似東流水
昔時少年今老矣荔支楊梅幾度紅柴門寂寂秋風裏

桑梓圖為左布政徐本賦

君侯早歲逢間闕聲名出鎮三楚間江湘霖雨起諸葛
環堵蒼生思謝安憂時兩鬢頽猶綠捧日孤衷明獨丹
笑揮霜刃向戎壘倒挽銀漢清八寰功成入奏麒麟殿
中外好官敷歷遍才華已羨冠西曹丰采還來照方面
荔支香凝粉署戟枕榔影入薇垣甸憑高作賦羨才華
拄笏看山憶鄉縣鄉縣迢迢路幾千齊安遠在長江邊
石牛青嶂接巴蜀螺湖綠水通湘沅鷗飛竹樓笑傲吏
鶴過赤壁懷詩仙迴廊忽披生色畫一幅驚湖萬金價

書屋斜連洛浦陰
漁船暝泊臨臯下
天低故隴鎖松栢
秋入平田熟禾稼
征帆去住却無情
王事鞅掌何由暇
皇恩詔錫許歸榮
稚子牽衣父老迎
更植社蓮招惠遠
添栽徑菊學淵明
香醪再潑新醅白
斷綺重尋舊譜聲
匡濟老臣心未減
却從江國望神京

題石城秋晚圖送人歸金華

金華小子天京客
登眺京城壯心魄
鍾嶽擎峰紫翠開
巴江一道東南坼
石頭艇子泛中流
白紵清歌起莫愁

雙闕五雲籠建業三槐高樹接揚州烟景清清何繇邈
對面楓林更蕭索月落烏啼北固城潮生鶴唳丹陽郭
懷親作賦已堪憐更托新圖與代傳瓊珮暫辭丹轂下
斑衣歸舞鯉庭前遠歸去去毗陵道歸日還應及冬早
冰下寒魚暫可叉霜餘櫛葉行堪掃天官若奏選材臣
應念詞林卓犖人君往承顏多暇日看花重入帝城春

西塘圖為姑蘇吳隱君題

放臣海曲懷京華孤旅天涯念鄉國誰傳此意入圖畫

令我一見三嘆息毗陵野老吳中人舊與季子曾相親
太湖三萬六千頃蕩漾咫尺闔門雲姑蘇臺荒烟樹綠
下著詩翁數椽屋涼風洲渚芙蓉開細雨林園木瓜熟
畫船撾鼓海天晴越女新裁白紵輕館娃宮暗暮雲合
子夜歌闌春水生李家風流誰與比況是吳興外孫子
曲几時攤舊賜書牙籤滿插前朝史南來無復少年狂
茅棟低低一炷香久嫌塵居隘容膝更置別業開西塘
西塘隱約湖山曲塘邊還種虎丘竹對酒菰蒲照座明

捲簾鷗鷺當窓浴此圖風致真可人點染直欲窮天真
平子愁來獨長詠張衡老去誰為鄰吾觀季子好風骨
正好還家及秋律筆沐茶竈逐天隨蓴菜鱸魚莫相失

贈皇甫隱士文遠

羣英濟濟登廟堂無復幽人卧空谷胡為冠帶隱屢市
有似山海遺珠玉先生風度與人殊面如頰玉仍禿鬚
侯門不掛一步脚厭殺人間咕躡儒蔣陵白下清溪曲
垂柳疎疎數椽屋芸窓磊落一萬卷客去自倚風軒讀

秦淮買竹起高樓興來酌酒樓上頭科頭舉白亂浮客
胡琴羌笛聲啾啾賓朋自飲還自散先生醉眠忘早晏
蒲葵巨扇醉不醒人定鐘闌始知飯沈酣本以陶性靈
有時兀坐還惺惺屯蒙火足金母嘯卦氣白白升黃庭
看君出處有妙策為人不遷亦不激隨時無恠互隱顯
意欲不遣人人識我昨初交沈逸民卜居遂與先生鄰
雪中長跼東郭履花下時掛淵明巾生平落落人少喜
先生一見便知己非因性情酷相似安得傾倒能如此

居安食飽即為家山林未必強京華君不見西湖處士骨已朽至今惟有寒梅花

題黃萬戶德清羅浮圖

將軍昔年在東都虎頭鐵面專城居重營柳暗流蘇帳
左掖花明金虎符東都郭外多林壑將軍公餘事行樂
露冕旌幢隘北山行厨賓從如東洛紫雲白雲千萬峰
羅浮更在二雲東古木千章排疊巖飛泉百道瀉晴虹
仙家洞天三十幾羅浮竄出滄洲裏紫極房櫳倚日開

蕊珠樓觀經天起，滄霞道士不知年。
夜禮星辰誦內篇，龍種玉芝耕赤谷。
鶴銜瑤草下青田，將軍此時事幽討。
追攀極欲凌穹昊，扶桑縹緲徐福舟。
輦路依稀漢陵道，別來倏忽幾冬春。
京洛相逢車馬塵，石室琅函仙夢遠。
朱衣瓊珮歲華新，新圖誰為將軍摸。
點染猶能記繇邈，雨過琪花定滿壇。
星沈寶氣應連閣，我與將軍總可憐。
遠遊經歲復經年，羅浮清賞如堪載。
同賦陶潛歸去篇。

贈關元帥景熙

君在前朝帥東閩虎符三珠秩二品轅門裨將懸金章
黃頭奴子州縣尹楊僕樓船下瀨時君隨左相入京師
端門萬錢宴珠履輦路干花明錦衣天官宗伯司邦典
藻鑑論君第高選君言下國羈旅臣生來好武文筆淺
願縮銅章佐壯征還來作吏錦官城宣勞豈言爵高下
貴在晚節完虛名歲華荏苒容鬢改朋舊飄零滿湖海
晨星霜木餘幾人我與蟾溪老高在前年佐縣淮山陰
今春待詔入詞林比來奉節領祀事會面錯愕驚愁心

郢筒新酒凝寒翠清夜懸燈共君醉醉來自起彈鳴箏
一曲清歌數行淚有歌有酒君莫辭人生會遇信有時
百年莽莽任所適不必借箸籌前期但憐奔波稀會面
此去何時復相見明朝掛席下瞿塘我似伯勞君似燕

戲贈端孝思

君不見長安遊俠兒銀鞍白馬青春時朝出呼盧夜飲
酒美人娟娟照窓牖若為君作梅花仙不隨桃李爭春
妍臨流自敞書畫軒獨夜可憐邀月飲一春長是背花

眠

送何都閩濟南省親至京還廣

伊昔關河事征戰君家嚴君擁方面君拜元戎領大藩
虎旗耀日光於電北山之北南河南鯨波虎壘相巉巖
轅門上日開將閩白馬朱纓銀作銜軍中呼盧日向午
錦筵置酒夜擊鼓龍潭降卒解西歌翁源女兒學東語
有時俘賊珠海頭海門六月如九秋牙旗揮天虎豹怒
霹靂迸火魚龍愁銀漢淋漓洗穹昊嚴親入覲承恩早

角巾還第誰最高君與君家兄弟好
鳩來寧親東入齋
歸舟一繫蔣陵西鶯花爛漫春如海
歌舞流連醉似泥
蟾溪高彬故部曲開宴斗門橋下屋
宣州梨子鶯兒黃
吳姬指纖白如玉酒酣耳熱悲故鄉
孫蕢在座情更傷
關河北去五千里目斷南天如許長
秦淮水生風似雨
十幅蒲帆醉中舉龍灣江口辭故人
小孤洲壯失前侶
知君第宅遶西湖門對羅浮列畫圖
梅花白白想猶昨
盧橘青青今有無
三郎今年三十幾
平生與蕢最知己

明歲春還若寄書玉堂華館西清裏

送友自餘杭歸富春

君住西湖已清楚胡為更憶莊遵渚歸舟昨日凌天風
湖水秋風似秋雨憶昔狂遊載酒行畫船為屋花為城
銀箏度曲對豪客紈扇題詩招小瓊小瓊雲鬢十八許
自按紅牙歌白紵歌罷流雲咽大堤舞回落月低南浦
高陽酒徒散如雲君亦攜書隱富春俠氣未全消野興
青蓑聊復謝塵氛富春世外真林壑不比西湖近城郭

楊柳當門春正深
珊瑚拂袖花初落
英髦豈必老江濱
天上應須有故人
重著羊裘趨鳳闕
還將高卧動星文

代內贈別 二首

君之去也青驪之駟不可追
妾之留也凌波之襪不可隨
僕夫倉黃戒往路
斷柳錯莫留殘暉
玉觴行酒和淚血
問君此去何時歸
何時歸亂心曲
春風看盡長安花
莫道新人如美玉

君不行兮夷猶長風颯颯
林木秋歲云暮矣
白日晚君

之行也不可以久留山川悠悠靡終極獨立空閨長嘆
息臨歧不得逐行蹤別後相思復何益水中摸月那得
輪鏡中照影那得真百年長是遠離別魂夢相逢那得
親

往平原別高彬

銀壺綠酒沾春宴環珮朝回奉天殿平生不作兒女悲
獨向高彬淚如霰高彬昔年桑梓雄好賢乃有古人風
東林詩社靜來結北海酒樽長不空竭來弓劍已蕭索

短髮如絲猶好客塞上葡萄火齊紅宣州梨子鶯兒白
沈綿不獨重相知文采今還勝昔時小樓焚香每讀易
淨几把筆常題詩今晨我作平原別高彬不意情欲絕
芙蓉香冷不堪贈楊柳枝黃未宜折龍灣江口石城頭
一幅蒲帆萬里秋暮雲紅樹儻相憶應有音書慰別愁

寄訶林長老明靜照

龐眉老僧無住著不問山林與城郭談禪到處即跏趺
白晝天花如雨落心知一境萬緣空靜與晴霄海月同

錫振春山常伏虎鉢含秋水自藏龍問師今年僧臘幾
手種蒼松舊松子松身已作蛟龍鱗定中一念猶未起
白石垂蘿淨窈冥爐香一炷兩函經澗猿時擊野果供
山鬼或倚寒巖聽荷為袈裟荔為帶世人見者皆再拜
師言是悉有漏因我今已入無色界十年奔走亂如絲
對榻論空不遂期每歎道緣於世淺惟師與我最相知

寄羅都事文章

梁侯昔在東藩時分符帥閩兼左司君為幕府貴賓客

咳唾一落成珠璣君年於我當父執我纔弱冠君六十
惠然下作忘年交令我夜夢生搗挹靈鼇峰在江水邊
清賞幾時同周旋題詩秋寫鳳林竹載酒夜泛蘭溪船
蘭溪溪水清如練興盡回船復開宴水底潛蛟聽鳳簫
波心皓月搖秋扇梁侯權勢盛莫當偏裨小校皆為郎
惟君與我得禮貌過者嘖嘖盈路旁別來風物何可道
華表青青但春草我騎驪馬走西東梁侯去矣君亦老
人生本是風花枝升沈聚散何足悲優游晚歲謝微祿

儻得從君林下期

送都大尹

使君家住餘杭曲年少狂遊事追逐蘇公堤上夜浮舟
越王祠前朝擊鞠餘杭山水綠葱蘢一片西湖照晚空
桂棹影搖桃葉浪菱歌聲徹竹枝風高陽酒侶動盈席
使君丰儀偏白皙湖光山色靜娟娟秋月冰壺影相射
折節年來學讀書褒衣章甫逐羣儒已超藝苑時流上
復恥陳編章句拘年紀今年三十七風流衆中稱第一

有才作縣寧以勞銅章綠綬須暫屈石頭艇子泛清秋
曉發金陵信下流已逐行雲經北固還隨輕浪到瓜洲
生來我亦悠悠客邂逅論文心莫逆家住江南五千里
送君又過江之北秋風淅淅江水波君行我留可柰何
長亭日夕一壺酒從此關山魂夢多

贈虹縣顏景明

淮陽老人讀周易風吹鬢絲人不識興闌移席傍寒梅
雙眼如貓對花碧天風毛骨江海仙偶來花下同清緣

凌雲文采鳳凰見照室丹光龍虎全清琴調古無人續
且可開樽掃苑屋胎禽起舞和雲謠山月光於畫樓燭

送虹縣尹陳景明

甲寅三月春欲盡我來洪州尋吏隱芳聲令譽誰最多
太立之孫陳大尹大尹昔是會稽人文章破的推殊倫
奉天門下拜天子來作洪州司土臣文章固自不必道
為官作事仍更好閭里小民持牒來撫摩直欲置懷抱
洪州昔日盛繁華大尹來時一百家稍闢丘墟攢井里

旋披荆棘樹桑麻
桑麻春深滿地黑
更掠浮泥種牟麥
接舍雞鳴桃李場
生羸犬吠藩牆側
祭社粉榆簫鼓鳴
羣農皆醉吏獨醒
羣農有酒只自飲
相見不揖亦不迎
官清事省無鞭扑
縣治門前可羅雀
種柳寧慚目老陶
栽花直欲強潘岳
父老皆言大尹賢
願留大尹更三年
政成入覲不可住
百里盼望心悄悄
單車就道虹亭曲
卧轍扳轅淚相續
囊裏時無劉寵錢
車旁肯掛時苗犢
三年俸米鶴同食
焦尾琴輕古錦寒
蕭然行李可一笑

羸得車中裊面寬芙蓉花開亦已謝十月清霜被平野
何因欲去更遲留父老相看不相捨黃河近日漲淮流
車到淮陽當換舟送行父老在平地感額先作風波愁
跨淮浮橋有客路我教兒男送君去便從淮右向琅琊
却望丹陽登北固北固青山連石城城南之下是天京
仙臺浮雲萬樹直帝里旭日千花明看花騎馬金陵道
金陵行行須及早知君富貴心淡然功名得後亦良好
宗伯金門奏美除政須賢令立高衢天京到日知安穩

多寄洪州父老書

送翰林典籍張敏行之官西上

燉煌城下沙如雪
燉煌城頭無六月
關西勁卒築防秋
捷書夜半飛龍樓
九重下詔徵貔虎
推轂上將開都府
黃旗捲日大軍行
旄頭化石夜有聲
燉煌迢迢五千里
十月即渡黃河水
上將翩翩才且雄
平戎不數貳師功
叱咤猶在輪臺北
足馬已入渠黎國
左校偏裨晚射鵰
倚鞍醉索單于朝
西山黑風吹墮瓦
霜角吹秋塞垣下

太平今見遠宣威君往從戎幾日歸幕下文儒兼解武
詞林從此耀關西

送崔振宗

入幕初拋憲郎粟芙蓉照水搖紅玉鸚書迢遞吳山雲
孤棹夷猶越江曲龍江二月千花餘好客元戎開酒樽
花前岸幘一回首應識前朝丞相孫

捕魚圖

小孤洲前春水綠泛湖小船如小屋白頭漁父不解愁

往來捕魚湖水頭得魚換米納官稅妻孥衣食長優游
大兒十三學網罟小女七歲能搖櫓江口賽神夜吹角
村邊賣魚朝打鼓雨來維梢依古岸風起鳴榔入長浦
荻芽短短桃花飛鱖魚上水鮒魚肥膾魚燒筍醉明月
蠻歌唱和聲咿咿月明在天光在水但願年年只如此
無風無浪安穩眠湖中有魚魚得錢

過隋宮故址

伊昔隋家全盛年周陳部曲按三邊端門徹夜笙歌合

琪樹經春錦繡纏經春錦繡何搖漾別有迷樓九霄上
連棋飛甍次第開朱簾繡柱森相向樓中美女花蔥籠
寫翠圖黃映曉空璧月瓊花新態度臨風結綺舊丰容
碧山螢火光於電更傍沈香山底宴窈窕清歌來夢兒
輕盈妙舞蓮花旋行樂還來爛漫遊天京移蹕望揚州
高起離宮連鳳闕斜穿汴水入龍舟龍舟錦纜映牙樯
玉簫金管切雲長仙禽自蛻歲蕤羽野鳥還為鸞鳳翔
棹歌楊柳春風晚扇影芙蓉秋露香芙蓉秋露香飄玉

臺榭俄成走麋鹿翠華夢斷雷塘路鐵馬聲喧太行麓
遼東浪死鬼啼道馬上夜遊誰度曲燕泥時自落空梁
庭草無人隨意綠繡華堪羨復堪憐高塚麒麟若箇邊
古路斜陽懸木末寒鴉流水遠村前荒基遠對唐陵樹
斷碣猶存大業年往事悠悠誰與共臨風為爾一潸然

題堵法曹文明所畫匡廬圖

墨樵仙翁髮垂耳少年嗜畫今老矣山雞野鹿是前身
每見青山樂忘死高堂醉掃匡廬巔香爐縹緲生紫烟

我來一見似相識彷彿偃卧彭郎船小孤魚肥春酒好
何當舉白醉五老芙蓉倒影月出早與君同上樂天亭
令人夜喚琵琶聽

次李陽河

櫓聲咿軋如人語魚吹浪花作飛雨停船把酒酌孤山
頃刻回梢失前侶危檣五兩飛向東李陽河水起西風
江豚翻波出復沒舟人倚柁認晴虹秋雲陰陰樹葉脫
樹頭黃雌猶聒聒明日雲開楚天轄

阻風雷港

秋霜夜落南港沙丹楓柿葉如春花江豚風應九月節
浦口獵獵吹薰葭柁公移船出沙尾蒲帆逆風不得使
鬪鳴雙櫓助咿啞鴈應中流水聲起白頭浪裏龍氣腥
三日不到舒州城攏船把酒醉河伯為問湏湧何當平
九華山色長自好行人一見一回老

次武昌

大風吹船如馬走船頭水聲作牛吼掛帆初發岳陽磯

轉舵俄灣武昌口武昌城頭黃鶴樓飛簷遠映鸚鵡洲
漢陽樹白烟景濕行人如鷗沙際立江南風土寒氣遲
居人九月著絺衣酒旗臨江開竹屋當壚小姬能楚曲
蜻蜓船尾旋回風今夕停船酒家宿

題錢叔昂瀟湘圖

遠山如游龍近石如踞虎秋陰迢迢樹楚楚乃是洞庭
瀟湘之極浦西來白波浮太虛鬼物似與空濛俱潭深
蜃氣結樓閣鮫人踏浪隨游魚織綃更泣明月珠綴成

懸璫素裙襦九疑並迎翠華輦絳節影低羣真趨須臾
長風起木末高林側亞葉亂脫浮雲散盡天宇豁雲水
遙連帶青濶蒼松翠竹黯未分殘霞斷靄餘斜抹錢郎
毛骨清畫此蕪衆妙疎疎臨水花白白遠山曉恍疑一
葉寒流中雨後開篷展清眺日落君山吹鳳簫水雲相
間作簫韶荒祠二女應魂斷試把芙蓉天外招

武昌別魯侍儀舍人文瀾

嘖嘖復嘖嘖人生交契真罕得我居翰苑君儀曹幾載

相聞不相識君名蚤已播南衢出入金門早奏書不謂
同乘建業水還來共食武昌魚武昌魚肥春酒好竟日
流連得傾倒黃鶴樓頭葉亂飛金沙洲上秋將老狂歌
浪謔清致同看君更有古人風才如關西楊伯起性似
城東陳孟公相親未幾還分手可憐新知樂未久君隨
征鴈入巴陵我掛雲帆汴川口歸期去去各悽然今夕
星河各一天秋晚還期來促膝與君同賦遠遊篇

次歸州

歸州城門半天裏白雲晚向城下起市廛架屋依岩巒
婦女提甕汲江水巴山雪消江水長城中夜聞灘瀨響
客船樹杪鉤石稜漁父雲端晒繒網家家蕪田山下犁
倒枯大樹燒作泥居人養犬獲山鹿稚子縛柴園野雞
楚王臺高對赤甲四時猛風長颯颯柁工鳴板避漩渦
櫓聲搖上黃牛峽

過瞿塘

我本江湖遠遊子扁舟遠過瞿塘水瞿塘八月秋風生

天上猿聲落蓬底鬼門關黑路險幽我行短髮寒颼颼
洪濤搖山角井裂怪石觸雪龜鼉愁冥搜欲極造化窟
颯爽始可清毛骨朝衝神女弄珠宮夜瞰鮫人織綃室
人生哀樂本無端歷此百折生淒酸橈翻健翅疾于鳥
那敢此地長盤桓離家江月今三皎歸棹乘流須及早
布帆明日掛回颿晴灘水落漩渦小

贈成都畫者徐文珍

徐郎瀟洒雲月姿早年讀易仍工詩金門獻賦髮種種

天隨艇子天之涯黃牛白馬瞿塘峽雨雪蕭騷鬢毛虱
馮虛歷覽更窮搜眼如飢鷹凍不匝竭來調笑諸侯門
錦城住屋如住村撐腸拄腹何所有銀河百折千崐崙
酒狂興發一揮掃渺漭雲烟塞晴昊黯入虛無鬼魅憐
光奔霹靂神蛟倒烟收雲散江海空峰巒錯出金芙蓉
恍疑八月十五夜一葉著我瀟湘中徐郎善畫世稀有
同時誰復稱妙手豪家屏障林壑間見者嗟吁不容口
我謂徐郎莫自輕便須濯筆寫蓬瀛層城弱水三萬里

與爾翱翔于玉京

鹽井

寒泓石底莓苔冷百尺長梯掛殘綆荒山寂寂無飛烟
父老相傳古鹽井灤東灤西十萬家煮鹽射利為生涯
筠筒直下汲清泚出釜燦白如霜花太平幸覩烽火息
十萬今無二三百官封此井不敢開歲歲渝州買鹽食

發忠州

顛風翻山雲黑黑星河無光江翕翕搖船夜半發忠州

漩深浪緊船欲立宣公祠下灘嘈嘈船頭著水低復高
石稜割裂箕斗影山鬼出雜魚龍號亦知風水莽回互
王事有程那得顧誰歌太白蜀道難和我靈均遠遊賦

下瞿塘

我從前月來西州錦官城下十日留回船正值九九節
巫山巫峽風颼颼人言灩澦大於馬瞿塘此時不可下
公家王事有程期敢憚微軀作人鮓人鮓甕頭翻白波
怒流觸石為漩渦柁公敲板助船客破浪一撇如飛梭

灘聲櫓聲歷亂聒緊搖手滑櫓易脫沿洄劃轉如旋風
半側船頭水花沒船頭半沒船尾高水花作雨飛鬢毛
爭牽百丈上崖谷舟子快捷如猿猱攬船把酒聊自勞
因笑輕生博竒好吟詩未解追謫仙天遣經行蜀中道
巴東東下想安流便指歸州向峽州船到岳陽應漸穩
洞庭霜降水如油

桂巖題王昌泰卷

桂樹叢生山之垆岩石磊落枝交撐隱如虬龍出滄溟

玄雲盤盤團紫清源秋石底金甍生天香紛飄浩盈盈
廣寒落陰湛空明五岳印影清岩亭珠光粼粼搖洞庭
美女倒躡黃鶴翎玉簫吹秋入冥冥嫦娥酌以玻璃觥
飛廉列缺撼不醒歸來芳洲呼禰衡記余天游神所經
仙家篆作山中銘

題四川都府照磨陳庭學小蘭雪軒

鮮桃郁李烘錦城白雪幽蘭冷空谷喧譁綺靡人所羨
君獨胡為愛清馥君方少年富文采早入西清掌書牘

天官宗伯司銓衡更佐邈臣鎮巴蜀開府同專三品印
退食初架三椽屋既營楚畹栽碧叢復對天花詠黃竹
春還國香始吐穎飛霰尚集風軒曲丹麤著粉餘嫩紅
劍葉堆瓊隱新綠一時芳致正稱妙更與千載相追逐
魯連節操高摩雲太白丰姿瑩如玉玉堂學士今太史
壯以詞翰盈篇軸龍鱗篆籀爭雪鮮金薤文章共蘭馥
我亦能吟君好事好買溪藤數千幅聯篇寫作清風圖
長使虹光貫岩麓

題綿州同知會僚古雪卷并序

左綿在巴西之西其西為陰平又其西為雪山雪山起南廬接北劍橫亘數千里四時巖岬皓白一色每歲六七月江流不雨漲涪陵激巫峽崩裂崖岸舟楫不得上下郡人曰西山之雪萬古不銷此迎日而化者其餘漸也望中瓊崖玉樹猶凜凜自若焉歲八月予以太常之節監祀於西川會賢倅會侯錦江之東侯蘇人也脩潔而文云在郡時開

風軒解宇之曲當西山之麓公餘退食日與寒光
灑彩為對朋舊目其處曰古雪云邀余詩余為賦

曰

開風軒望古雪瓊崖瑤嶂千萬尋琪樹珠林互明
滅此雪千年亦不消寒光灑彩長習堯火雲六月
爍金石滕六萬片天花飄曾侯仙中人胸次同皎
潔公餘對雪開風軒岩壑窗扇兩奇絕高寒上與
元氣通冰光百道飛白虹羣真縹緲下瑤席高駕

縞車乘玉龍我昨神遊共清賞
羽服脩脩恣長往
浩水花明載酒船
天池月照披風鬣
峨眉蒼翠接
仙臺縹緲坡翁跨
鶴來桃花犬吠空齋裏
黃竹柴門君自開

題張侍儀貞白獨冷軒

留侯之孫瓊玉相脩然
竄立洞八荒顏如梅花開
曉芳曲眉烟霏婉清揚
朗吟碧空古洞章
飄風流鈴韻何長
璧月瑩瑩夜未央
天壇萬籟鳴清商
歸來人間寄徜徉

寒山互谷開雲房層冰嵯峨照座光虬龍松檜交青蒼
飛廉怒號滕六狂舞霰不作天花香四簷銀竹聲琳琅
山鬼獨宿神蛇藏漁童樵豎凍欲僵先生兀然方坐忘
虛室生白萃吉祥金彪不躍龍不驥華池神水淡汪汪
開元丹田內煒煌幽齋無人隙軒窻雲封茶竈籠筆牀
故人山陰回酒航老鶴赤壁愁橫江神遊清都朝帝鄉
珍珠為樓玉為堂羣真環珮參翱翔皆騎素麒白鳳凰
塵中六月川氣黃我行汗雨如迸漿桂舟無楫川無梁

安得送我置汝旁衣之織女青霓裳酌以西母玻璃觴
頓令煩歎化清涼毛骨爽颯三秋霜

題葉夷仲瞻雲軒

天台之山天尺咫葉侯家住天台裏侯家兄弟聯班行
總以才名佐天子大侯作縣多政聲小侯差小亦作丞
鄉人聚首作密語阿堵名門生寧馨名門寧馨相濟楚
大侯好文兼好武小侯詞賦亦驚人五言七言追樂府
天台本與仙家鄰二侯亦是仙中人芝蘭玉樹曉輝映

桃花流水春氤氳十年分散遊梁楚匆匆高堂日將暮
大侯去家已可憐小侯在官心更苦日想嚴親鬢已霜
二兒有淚如迸漿凌風欲借雙黃鵠千里送兒還故鄉
鄉中何物令儂羨雲去雲來千萬片雲來桑梓杳莫分
雲去鄉關隱還見豈無揚子屋三椽亦有蘇秦二頃田
同居貧賤心亦樂富貴遠別徒悵悵三椽足以庇風雨
二頃寧當代未泰宦遊經歲復經年胡不遄歸奈何許
丹陽水通東浙河儂今欲度水無波石頭艇子無錢買

雲去雲來奈爾何

題唐侍儀雙鯉軒

唐生昔侍雙親時
當庭日舞如花枝
嚴親去世慈母在
孝養足慰無窮悲
唐生今年三十幾
慈母高堂尚多祉
養志誰能論八珍
作堂暫寄名雙鯉
雙鯉雙鯉白且鮮
日須二斗新銅錢
寧勞姜婦水中覓
不學王生水上眠
人生有親殊可樂
親饌有魚尤不惡
娛樂從茲到白頭
聲名況是登黃閣
我生我生纏百憂
庭幃風木悲清秋

為君援筆賦雙鯉每一讀時清涕流

題孫典伏可居軒

五宗孫子雲鶴仙荷衣蕙帶神飄然朝吟屈子遠遊賦
夜誦莊生秋水篇五湖風月窮清賞青雀為艫桂為舫
二女祠前聽鳳簫小孤洲北聲漁榜歸來匹馬逐嫖姚
環珮鏗鏘近九霄承恩日侍金鑾殿卜築還依朱雀橋
橋頭流水清如玉楊柳青青映書屋照座雖無鄂渚花
當庭亦種沅湘竹沅湘竹色報春遲文玉疎疎只數枝

客去每憑詩作伴朝回偏與靜相宜卜築不雕亦不畫
廳事門前僅旋馬高題漢篆名可居君作其中可居者
人生出處本無端坎止流行信可安君不見長安甲第
連雲起贏得人間圖畫裏

題荆徵士茂之藏楊補之梅花圖

老荆好梅如好色嘉樹寧論萬金直屢乘泛雪王子舟
長躡登山謝公屐萬壑千林秋葉乾飛鴻墮影報新寒
塞北偏令百草折江南還得一花看此花看處真奇絕

豹脚蛇鱗綴香雪楚女輕盈練素裙湘娥冷淡臙脂血
破寒疎瘦未宜人照波臨水韻如真却月觀前新態度
凌風臺下舊精神梅花萬樹先春發老荆此時情欲絕
爛醉寧辭水部狂清吟擬補離騷缺歸來白髮老京華
無復孤山興趣佳凍蕊枯枝誰更羨夭桃郁李世爭誇
畫圖忽覩陽和面老荆手段却輕旋彷彿瑤池月下逢
依稀庾嶺雲中見無情有恨獨遲遲世外丰容只自知
黃閣由来皆貴眼楊郎老去負明時開圖見花被花惱

有圖有花圖亦好月落參橫奈爾何江空歲晏令人老
老荆老荆吾所憐九還詮訣會當傳芙蓉寶鼎丹砂熟
去作羅浮峰頂仙

題蘇明遠畫竹圖

蘇郎畫竹如寫帖珊瑚為枝篆籀葉寒梢不及三尺長
遠勢直與青冥接青冥不辨西與東雲光竹色俱空濛
飛廉排山振鸞鷲霹靂迸火驚蛇龍竒搜不獨竹色老
竹旁有石仍更好想其落筆當酒酣人間屏障愁絕倒

近時吳興趙子昂最能寫竹窮青蒼蘇郎晚出繼芳躅
湖海二妙相輝光十年不到瀟湘浦環珮空懷玉簫女
相期共泛書畫船濃墨淒迷掃烟雨

題楊肇初墨菊圖

蘇郎墨菊真有香老墨落紙生秋霜宛然著我三徑底
日與野老同徜徉生平愛畫仍愛菊令人見此二美足
猶疑已是重陽過寒花落葉心簇簇憶昨蘇郎畫菊時
君家數本方離披誰云清致不兼得更對濁酒開東籬

明朝酒醒賓客去君獨沈吟空繞樹還看君家墨菊圖
君家此樂陶家無

題袁清溪所藏雪夜泛舟圖

錢顥畫山工畫雪山下寒江更竒絕萬壑千林鳥倦飛
蒼松古栢凍欲折清人何日縱冶遊銀濤渺渺著孤舟
黃鬢碧杓置蓬底定是山陰王子猷故人高居剡溪曲
窄窄柴門鎖黃竹遙憐孤鶴怨空山塵榻無人伴幽獨
披蓑童頭縮蝟毛龍鱗冰片難容篙凌兢歷覽有何好

博得老眼如饞猫衝寒乘興莫匆促回船攏岸也不俗
故人開軒掃茅屋問字床頭抗酒壺留連坐到東方旭

題廉徵士夢雪舟

廉生心性如野鷗前身恐是王子猷城居十載困炎熱
夜夢泛雪乘扁舟扁舟一葉凌寒水更著壺觴翦蓬底
鼓柁疑過柳港邊乘潮似出沙洲嘴月華雪色冰玉同
粼粼萬頃涵晴空明月上樓元氣白皓彩直與銀河通
故人山陰無茅屋何處重尋剡溪曲惟應赤壁鳴皋仙

夜半橫江慰幽獨

題陳隱君菊莊卷後

隱君種豆南山陔，清晨荷鋤薄暮歸。
餘閒更學樹叢菊，茅屋前頭花作圍。
此花不比桃與李，萬木凋零方吐蕊。
耀日黃金淺淺紅，凌霜白玉深深紫。
孤芳似與九九期，落英不落長滿枝。
嫣然羞作兒女艷，高潔獨抱幽人姿。
此時隱君徐步屨，晨光熹微風獵獵。
晚圃寒花語斷蛩，東籬冷露留殘蝶。
洛陽金谷盛繁華，江渚芙蓉照館娃。

歌臺舞榭豈不好淡烟芳草令人嗟歲華將暮衡門裏
寄傲羲皇時隱几見月開籠放白鷗穿林採藥尋黃綺
平生嗜酒仍嗜書詩比淵明差未如還開三逕望儔侶
亦有五柳臨庭除素琴撫絃惟袖手葛巾且漉柴桑酒
莫勞更賦歸去來惹得聲名滿人口

題唐仙方伎圖布政徐本所藏

九重春色浮金輦柳暉雕簷晝陰轉閣門無事簡書稀
朝下三郎幸南苑仗底微風拂赭黃熏爐別殿送天香

昭容婉孌翠娥黛內史委蛇宮錦囊飄飄野老來何許
賜坐從容陪讌語卦氣初生石鼎丹清風自是蓬壺侶
奚童忽啟文書箱白驪隨地走如羊金華不識紫烟客
那得化石初平方驪山未起朝元閣誰遣御前方伎作
招邀青鳥天際來勾引霓裳月中落漁陽鐵騎戰塵生
雲棧縈紆路不平此時安得仙翁術化作潼關百萬兵

題桃源圖


我昔城居困塵土十年不到青山塢扁舟夜夢泛滄浪

鼓枻揚舲逐漁父江船沿洄落日低尋源直上武陵溪
逶迤綠水春將晚爛漫桃花路欲迷尋源忽得青山口
髣髴微香露林藪溪流已盡復潛通石洞斜穿不知久
地廓川平景曠然還疑別是一重天迢遙山逕莓苔雨
縹緲人間桑柘烟遙觀但見攢林木近入茆茨始成簇
居人不改故衣冠井里猶存舊風俗風俗依依世上人
皆言來此避強秦初期暫隱還鄉邑遂爾高居隔世塵
兒孫長大供衣食男事耕耘女蠶績春至桑麻雨露深

歲寒松栢星霜易東臯北隴恣鉏犂戴勝飛飛布穀啼
傍舍雨晴雲外牧餉田日晏草中歸歸來路暗山光滅
婦女繰車聲未歇舴艋仍教稚子撐漁罾更喚奚童結
往來墟落只逍遙無復舟師下叫囂社日冬旬會村曲
黃雞白酒話漁樵漁樵不識人間世雨笠烟蓑但容裔
澗水冰融覺候和庭柯葉落知風厲問我何為作此來
仙凡迥隔兩悠哉園裏青蔬為君摘瓦盆薄酒為君開
東鄰西舍爭來聚相邀具酒猶炊黍旋除新竹敞南軒

更掃落花開別墅初聞羸氏好紛奢不謂山河屬漢家
金雀重來飛灌木銅駝還去卧烟沙銅駝金雀何時已
年代不知今半是世上紛紜日漸過山中歲月誰能紀
棹開酒醒悵蘧蘧却向山家對畫圖物外烟霞猶髣髴
空中樓閣已模糊模糊髣髴何由辨只似當時眼中見
鶴唳松梢露氣消雞鳴樹杪晨光炫臨風撫卷獨踟躕
欲寄桃源父老書澗戶岩扉應未合筆牀茶竈近何如
桃源桃源莫浪誇未必山林穢城郭車書四海今混同

來享人間太平樂



西菴集卷四

欽定四庫全書

集部

西菴集卷

五至
七

詳校官庶吉士臣龍廷槐

中書臣劉源溥覆勘

總校官庶吉士臣何思鈞

校對官中書臣王鍾泰

謄錄監生臣蕭倚年

欽定四庫全書

西菴集卷五

明 孫蕢 撰

五言律

雨中寄友

客有還家夢空山雨正來
寒生衣袖薄風急樹雲開
掩戶坐終日思君重幾迴
琴邊有清興能復醉深杯

山中寫懷

野館愁俱寂空林日未斜
看雲偏憶母為客久辭家
獨自嗟萍梗非關戀物華
晚來山雨裏猶見杜鵑花

光孝寺

雨葉菩提樹天花薝蔔林
塵機方外息幽趣靜中深
野色連香積秋聲雜梵音
隨緣僧供裏予亦長禪心

酬王道原

鳳池鴛鴦侶幾載此南遷
柳色迎征棹薇香憶盛年
訟庭栽白蠟官步到紅船
我亦金門客逢君思黯然

過東阿懷雪蓬

故人今不見，孤客倩誰憐。
事業清時困，名聲舊邑傳。
紫髯風獵獵，紗帽月娟娟。
僮遂幽園約，琴樽共晚年。

荔灣漁隱

家住半塘曲，沿回幾折灣。
門前荔支熟，屋後釣舟閒。
杳邈熊羆兆，空濛虎豹關。
如何三里外，便是五湖間。

五言排律

翠筠軒為源上座題

篔竹本脩脩僧房分外幽祇園栽未合因地養初稠苦
節頭陀行虛心般若舟禪餘金粉落定起籜龍抽渭葉
慈雲護湘枝法雨流斜穿瘞雁塔高過講經樓色映菩
提靜陰連蒼筍浮護持澆記日山偈刻枝秋掛袖踈螢
度煎茶病鶴愁箇繁教畧洗籬缺更須求臘紀應同祖
清緣或共修移床看翠蓀斫汗試銀鈎玉版供香積漁
竿拂石頭風旛搖瑣碎月磬和蕭颺閱歲開荒徑尋盟
到野鷗閒門邀蔣詡精舍候王猷石上攤碁局林邊列

酒甌素琴調白雪彩筆畫滄洲興與梅花共心同造物
游更須三內翰飛錫問揚州

七言律

南山雜詠

湘潭千頃碧波澄爭似南山一段青山雨欲來雲氣重
江鷗飛去釣船輕詩成多是琴邊興老去應憐物外情
閒喚小童敲白石不知芳草夜來生

峽山寺

三首其三與鄭御史李
踰國同登時再召赴關

峽東滄江萬壑雷
梵王樓閣倚天開
山從中宿城邊去
水自連州港口來
雲葉捲時猿獻果
雨花飛處客登臺
青鞋未訪和光洞
奏賦金門亦壯哉

竹裏維舟陟翠微
閒門臨水欲嶮巖
雲生佛殿飛來處
猿嘯山僧出定時
斷刻尚餘梁日記
古松猶偃漢朝枝
煙霞二妙應相笑
盛世藏珍負夙期

明日青陽逼歲闌
繡衣聊得共躋攀
雲鋪鶴背浮金殿
風引猿聲怨玉環
薄宦豈堪長在客
故鄉惟有一登山

繩床睡暖梅花月
輪與蒲庵老衲閒

遊羅浮 三首

白鶴峯頭春暮時
水簾洞口鶴鷗飛
千林錦樹化紅雨
百道玉虹穿翠微
神朝帝闕鶴為騎
靈語仙壇霞作衣
坐憐佳致惱魂夢
應覓真人扣息機

四百峯巒列海圖
飛雲絕頂敞玄都
丹砂五色時光焰
紫翠中天半有無
觀裏松株皆住鶴
山中竹葉盡成符
鐵橋歸去尋清賞
爛醉仙人白玉壺

四百峯巖拱御臺蕊珠樓閣倚雲開
荔支花落山鳩語
盧橘子生江燕來
黃野故居羊化石
葛洪丹竈錦為苔
仙遊倘遂凌風約
羽服黃冠亦快哉

拜祖墓

芳草淒淒夕照前
獨將春酒酌荒阡
已嗟世事成千古
纔說清明又一年
滿目江山增舊恨
幾家榆火起新煙
從來俯仰傷懷抱
不似于今倍黯然

重過林氏別業

曾侍先君訪太丘，葛巾投老尚封侯。
青筠簾捲風生席，白紵歌殘月滿舟。
興發共吟鸚鵡賦，酒闌重解鸕鷀裘。
傳家幸有賢孫子，別業新成似舊遊。

題海翁詩卷後

海屋珊瑚幾度花，仙籌長為記年華。
天晴霧雨籠蛟室，夜冷星辰泊釣槎。
巢父詩篇留宇內，嚴陵名字達皇家。
無因一遂神遊約，共覓安期棗似瓜。

靈洲

金鰲露背出滄溟撐拄惟應倩巨靈坡老留題空斷碣
德雲種栢滿幽庭天寒怖鴿依江渚夜靜靈龜聽塔經
畫舫圖書催入覲庾梅闢北樹青青

秋江送別

千家城郭遠依依握手離筵話夕暉碧海雲深秋自老
蘆花風急雁初飛客情猶醉千鍾酒書劒誰憐萬里歸
慈母白頭應問信倚門遙識老萊衣

送趙宣使之德慶

阿翁高步金螯背南郡今留彩鳳雛名姓幾年通上國
才華蚤歲入中書花明畫省詩千首木落寒灘酒一壺
若到康州煩借問故人黃趙近何如

鍾山應制

蒼翠巍峩插昊穹紫金突起大江東三山避跡投鯨海
五岳齊肩擁帝宮珠樹鳳鸞鳴瑞日寶圻龍虎壯威風
萬年聖壽高堪並常有神人祝華嵩

新春從幸天界寺次詹冢宰鍾山應制韻

天界叢林開象魏
朱衣環珮儼羣仙
瑞露迎鑿飛扈蹕
皇都佳氣藹新年
玉宸香滿三千界
蓮座光浮尺五天
勅賜御前催應制
侍臣簪筆思如泉

駕遊鍾山應制

玉宸警蹕出蓬萊
近望名山翠色開
松栢屯雲車騎過
峯巒簇錦節旄來
九成奏樂喧泉澗
百職聯班蹴磴苔
燕賞太平當賦咏
小臣侍從媿非才

駕幸天界寺和朱太史芾韻

宴語從容對上方侍臣揮翰筆如杠從行衛士隨僧供
出定經聲歇梵腔驚嶺曉雲扶輦轂龍河春水漾旌幢
清平自覺文章盛長憶天兵未渡江

陪翰林宋承旨遊鍾山

天上禪關敞薜蘿每緣休沐得經過雲籠梵宇青蓮濕
地接皇居紫氣多甘露結花凝木末醴泉和雨落岩阿
欲陪謝傅金屏約未解朝簪奈爾何

訶林送趙生留南歸

幾年煙月共林垞此日看花入鳳城老我未酬清世念
別君因起故園情朝廷有道容樗散獻納無才愧聖明
歸去為煩先問訊滄江漁艇白鷗盟

寄趙進士安中

詞林每問歸安使聞說先生在德清暇日畫簾公吏散
春風華館子衿明三年不見新書札百里空傳舊政聲
日暮碧雲何處合思君吟遍石頭城

送張典籍訥之官大同經歷 三首

春風鳴玉下天階萬里從戎亦快哉
遠仗皇威清朔漠更依雲氣望蓬萊
參軍孫楚登瀛客檄陳琳補袞才
邊事太平烽火息柳營羌角為誰哀

邊陲見說青烽滅贊畫遙知白羽閒
夜月葡萄蘂帳底春風箠柳營間
賈生長是懷金闕定遠安能老玉關
沙漠年年飛羽捷想隨驃騎凱歌還

文章堂上論文日對榻哦詩白晝長
晴日畫簾窺水映暖風羅袂散天香
尋常應制才堪並四十從戎鬢未蒼

春半黃河水片解旌麾幾日望燉煌

奉太史令護軍公

虞淵捧日帝羽儀
文事武備天人師
筆端詞翰河漢決
胸次韜畧風雲隨
邦基肇造古伊呂
謨猷篤非今臯夔
畫圖麒麟盟帶礪
仙遊更與赤松期

投贈山東何方伯二首

皇風來播南陲日
開府兼持將相權
千里分封鸞誥下
三珠耀日虎符懸
長憐野日違清顧
且喜恩光照暮年

勳業已成頭半白
蔣陵佳氣麗中天

君侯昔在東藩時
英風遠畧人共知
帳前鐵騎金鎖甲
腰下寶玦珊瑚枝
將相兼權未足貴
身名兩存今始竒
便可臨風搔白首
對酒且賦歸來詞

送張翰林孟庶赴山西行軍 二首

漢將防邊意氣豪
參軍行處擁旌旄
雲連白雪飛花片
風捲黃沙似海濤
塞曲但聞吹箏篋
人家多自種葡萄
昇平見說從戎樂
欲解儒衣問戰袍

清時況是金閨老躍馬關河鬢未華翠柳東門開祖帳
黃河北岸擁高牙安邊羽檄傳司馬落帽西風憶孟嘉
萬里封侯吾輩事遲君談笑鎮龍沙

奉酬劉友賢黎仲輝二御史見過

故人驄馬曉相過錯莫鄰人避玉珂朝下楚城高蓋合
春深門巷落花多飛騰每羨青雲早衰懶無如白髮何
相見惟期樹勳業蔣陵佳氣正嵯峨

寄彭萬里給事時叅山西政

與君文采舊同朝，翠管文章上九霄。
輦路香風隨鹵簿，天壇花雨聽簫韶。
鷓鴣一別京關遠，雲月三年楚水遙。
欲寄清詩慰寥閔，汴河東去近無潮。

送沈主事起復除西安知縣

年少天官舊考功，馬蹄催入未央宮。
聲名已在雲霄上，鄉國猶懸涕淚中。
輦路繁花明日旭，佳城喬木語天風。
傳家正欲存忠孝，千古君臣此道同。

寄羅友章先生

三年薄宦淹吳楚長憶先生在海涯不著朱衣垂玉佩
還將白髮映烏紗遙天劒氣藏珠斗百越文光絢綵霞
雲路相期苦相失春鶯啼徹上林花

圜丘大祀

松柏蕭森倚半空天壇高峙帝城東宸旒肅穆千官合
鹵簿輝煌萬國同上界清都移碧落泰階黃道隱晴虹
相如莫獻青鸞賦不是祈靈太乙宮

寄黃員外文博時佐守徐州

使君文學冠賢科入拜工曹意氣多五色雲中披奏牘
九重天上振鳴珂趨朝共沐恩波濶出守誰憐歲月過
會有蒲輪徵故舊未應黃髮老蹉跎

送劉芳之入蜀

峨眉西上穆陵關猶似簾櫳響珮環華月高秋沉楚館
綵雲清曉散巫山鸞衿寄恨今宵永錦字傳情幾日還
惆悵風前花落盡相思惟有淚潸潸

餞宋承旨潛溪先生致仕歸金華

鰲峯朝日鵲聲稀內使傳宣下紫微予告不須留秘閣
許歸仍及賜春衣恩濃玉檢天書濕人去金莖瑞氣晞
况是陽和二三月都門柳色正依依

承恩初入詞林日亦得叨陪侍從班雲影九重開鳳閣
天光咫尺近龍顏彤闈侍讀青春暖彩筆題詩白日閑
此去定酬優老願軟輪遊遍越東山

保傅儲皇二十春白頭歸去歲華新優賢寵渥非緣老
蓋世文章不是貧錦誥渙頒雲五色青宮喜見日重輪

懸知戀闕丹心在長倚遙天望紫宸

一自先生離禁闥玉堂清致更無人
金蓮颺彩初寒夕
燕寢凝香散暮春
著作有官惟故事
論思此道竟誰陳
青雲志氣慚悲梗
不覺臨歧淚滿巾

龍門佳致接仙山
舊築茆堂紫翠間
方外羽人霞作袂
瀛洲歸客玉為顏
常時望氣懷京國
午夜朝真響珮環
願祝聖朝千萬壽
還隨笙鶴到天關

贈修撰道夫

蓬髮飄蕭洛上翁
金門日日候晨鐘
論思入奏天光近
對御題詩燭影紅
衣故尚餘當日
繡馬寒猶是舊時
驄
詞華已作青雲客
聖代于今雨露濃

西樵

西樵山勢捲飛龍
萬里扶桑海色通
日麗錦巖開罨畫
雨餘銀渚漾芙蓉
紉河車蔭仙人掌
白鶴花明玉女峯
上相朝元鳴玉佩
三城佳氣鬱龍葱

懷修撰朱備萬

先生舊是瀛洲客，文藻風流第一人。
華月玉堂仙署冷，西風遼海鬢毛新。
文園最憶相如賦，茅屋誰憐杜老貧。
聖世雲衢需俊彥，肯令漂泊暮江濱。

冬至

冬至至日日初長，久客懷懷故鄉梅。
葢惟愁雪爛漫，柳條又是春相將。
懶朝違世真自笑，憶遠寄書殊未央。
海門關外暮雲合，應有南還征雁翔。

乙卯除夕

四十今已過二年明日又復歲華遷頭顱種種見白髮
生計落落仍青氈梅花亂開客愁裏雲物長迷鄉國邊
且可吟詩酌春酒爛漫取醉東風前

鳳凰臺

綺翮千年去已遙古臺猶見碧岩堯楓林曉露迷三楚
柳陌春風暗六朝狂客昔時揮彩筆飛仙何處捻瓊簫
惟餘一道巴江水流向天門作海潮

再遊鍾山

空青樓閣窅冥間云是東南第一山武帝鸞旂烟草碧
誌公龍錫雨花開江光遠盪鼉鼉窟雲氣常籠虎豹關
欲駕天風凌絕頂上方琪樹夕陽還

懷舊遊寄李士行

憶上高臺望赤霄火輪光動彩虹飄鮫人夜織明珠佩
龍女晨叅絳節朝迤北關山周正朔平南將校漢嫖姚
狂遊又是三年別海上蟠桃露氣銷

寄高彬

條風二月古隋堤楊柳青青拂水齊萬里客懷將白髮
一年春信又黃鸝親朋歲久愁多望故國詩成醉懶題
惟有別君情不淺夢中時到石城西

送蔡九節還南安

幾年為客怕逢秋每見春來憶舊遊歸夢夜隨寒雨急
片帆春逐大江流看山有興還堪寫惜別從來不解愁
斗酒殷勤拚一醉相思何處却登樓

春興寄端方故居

亂藤高竹散清烟，獨倚闌干思渺然。
流水浪隨春浦濶，故人家住白雲邊。
三年遠別空相憶，一段新愁自可憐。
欲得山陰晴夜雪，東風吹放大江船。

送人還鄉

歲晏那堪送獨歸，石門烟樹晚依依。
幾回客思愁江浦，十幅蒲帆掛夕暉。
沽酒乍聞何處笛，問程應為故山薇。
到時猶想多幽興，一樂堂深見舞衣。

西巖圖為嚴彥恭題

欲寫滄浪愧不才
畫圖今喜見君開
峯壑影落寒潭靜
欸乃聲從返照來
千頃白波龍伯國
百年高興子陵臺
聞君早晚趨金闕
風雨漁磯長綠苔

懷白雲山房

家住滄洲洲上山
數椽茅屋亂雲間
天晴疊嶂開金碧
雨過清泉響珮環
高興別來長寂寞
故人誰與共躋攀
洞門猿鶴應相問
何事先生久未還

除夜

大地白雪似白沙遊子况復未歸家寒雲黯淡暗海曲
春風浩蕩來天涯楚山盧橘漸舒葉故園枇杷應著花
未得乘船出京口枯坐旅邸如春蛙

西菴集卷五

欽定四庫全書

西菴集卷六

明 孫黃 撰

七言律

之官平原留別諸老

朱衣和淚別龍庭，瘦馬嘶風出鳳城。
托迹禁幃原已重，之官名邑未全輕。
驅馳祗笑儒生拙，憫念難忘聖主情。
後夜玉堂清漏永，紫薇花月向誰明。

別妓

驪駒西上帝皇州斜抱雲和淚暗流子夜歌詞翻白雪
殘春風物似清秋青鸞信斷陽臺路翠被香寒燕子樓
七十二泉縈別恨濟南烟樹綠幽幽

江上

江上青楓初著花客帆和月宿蕙葭過雲疎雨數千點
臨水小村三四家風起漁船依釣石潮回歸雁認平沙
秋懷已向南天盡又是滄洲閱歲華

金山寺

玄洲貝闕爛相輝
夾岸人家對敞扉
四壁波濤長觸石
孤山花木自成圍
橫江鶴向揚州去
泛櫓僧從建業歸
遷客憑闌重回首
蓬萊雲氣曉熹微

送牛應祥都閩

將軍淮北分符地
正在隋家古汴河
別館芙蓉飄繡帽
御堤楊柳映雕戈
彊兵戍久通蕃語
降豎年深解漢歌
此去看花朝上國
春風天上聽鳴珂

高郵

山日未出煙渺茫高郵放船催下江
搖櫓唱歌白鷄子
過湖打鼓黃頭郎烏拖雲葉低貼水
魚喫浪花高接窓
微官所得幾何計吟鬢四十今蒼蒼

秋風

秋風淅淅吹屏山汴河之水聲潺潺
歸雲一似宦情薄
飛雁不將鄉信還千峯澹對寂寞景
孤客况棲羈旅間
且可狂歌對樽酒未須慘戚懷江關

秋風淅淅吹江亭汴河之柳猶青青黃姑東渡會七夕
白帝西來朝百靈初開琪樹已云落遠別客愁今未醒
欲寫鄉書寄南雁故園萬里天冥冥

虹縣九日登五女塚

三首

肺氣經秋久未平佳辰酌酒看君傾雨催黃菊非無意
風落烏紗最有情仙客此時緜頰上彩鸞何處玉簫聲
透遲未就丹砂術俛仰微官愧此生

老去佳辰得幾逢登臨此會歎匆匆雲來汴水波光白

全一八
卷六
日落屏山樹杪紅，抱病獨憐貧子美。休官惟羨老陶翁，
遙知弟妹家山裏。幾向天涯倚斷鴻。

五女峯頭烟樹荒，登臨聊得散徜徉。忽驚重九今朝是，
却憶三千客路長。冷露餘花偏有色，朔雲斷雁不成行。
寧教醉裏逢佳節，且免醒來望故鄉。

淮上憶京

去歲茲辰客帝畿，蔣陵西曲雁飛飛。秋風叢菊開荒逕，
落日浮雲滿翠微。老去吟邊芳物改，別來天上故人稀。

登臨復對青樽酒醉倚淮山憶禁闈

清河口

清河黃河相間流四月五月如九秋墨雲壓地箕斗黑
濁浪吐雪龍魚愁江河萬里杳何極行役半生猶未休
故園清興自不淺此日松竹風颼颼

圯上懷古

草沒荒臺烟樹疎維舟凝眺久踟躇凌波見說求仙履
博浪曾聞誤副車勲業赤龍三尺劔風雲黃石一編書

獨憐衣赭人如玉
鴻鵠歌殘怨有餘

過三洪

官舟已落三洪口
猶在飛流湏湧間
放棹忽聞過亂石
開窓始覺慰愁顏
雲連雪浪瞿塘峽
樹隱青泥古劔關
謾有微吟追太白
此身疑謫夜郎還

過呂梁

二月三月寒尚饒
上洪下洪春雪消
奔霆出地星火裂
吼浪觸石鼉鼉驕
晨昏霧底蒼水佩
明滅雲中丹鳳簫

靈風為我送歸棹故國越海天迢迢

帝子

彭城三月風氣和呂梁雪消春水多濁霧蟠空作飛雨
崩濤薄岸成盤渦鮫人珠佩影明滅龍女金支光盪摩
故山雲物幾時見遷客此地長經過

徐州洪 二首

呂梁積石天崢嶸徐州上洪波稍平蛟龍怒卷四時雨
砥柱亂落三秋星辛夷杜若散洲渚貝闕珠宮開窈冥

舟人倚棹笑相語九里山色連彭城

龍門鐵石倚天開彷彿瞿塘滌瀨堆萬里江風來灑氣
九秋晴雪迸驚雷層陰水府和雲見濁浪漩渦劃岸迴
小艤扁舟待明發霸王臺下久徘徊

漢祖廟

長陵見說石麟荒遺廟丹青野水旁古劍星光時出沒
大風雲氣尚飛揚三秦寶鼎垂鴻業萬歲英魂戀故鄉
莫怪憑高重回首楚臺烟樹鬱青蒼

歌風臺

漢陵秋樹起蒼煙故里高臺夕照邊
逐鹿洪圖今已矣歌風遺跡尚依然
赤松人去封留候夢澤雲浮狩楚年
可是君王思猛士青峯和雪暗遙天

戲馬臺

蓋世英雄亦壯哉古河三面對荒臺
漢家陵闕迷春雨羸國江山起暮埃
雄劍昔年金鏃鏞龍媒此日錦韞褫
鄉雲一笑山花動疑是君王衣繡來

范增墓

舊識荊州老將名，秋風此日過佳城。
羣雄逐鹿留遺跡，稚子求羊入廢塋。
玉斗有聲松雪落，蒼精無影石麟橫。
可憐牢落祥雲氣，又向芒碭谷口生。

過黃石公祠

塵編寥落千秋事，野客停舟問隱居。
煙月高名興漢後，風雲遠畧避秦餘。
赤松仙子依丹室，黃石山精護素書。
歲晚圯橋風物改，泥中履迹近何如。

過高唐

瘦馬嘶春北郭門
郡城茅屋似山村
荒墳盼子雄風在
野曲繇駒舊譜存
霏霧出林銷殺氣
行雲駐彩閣朝昏
千年往事今塵土
寥落幽花酒一樽

客平原春日有懷

悵望鄉園去計違
春來惟有思依依
客程故向南天遠
花信偏於北地遲
漢帝苑邊盧橘熟
秦佗墓上鷓鴣飛
柴門獨對東風掩
此日松筠冷翠微

宿高彬第

夜宿故人孤旅邸更深華月滿晴空朋游動是經年別
樽酒寧知此會同上國鶯花明戚里故山松柏語天風
豪吟未覺清狂盡醉裏詩成氣吐虹

挽夏尚忠

疋馬江南更度關寒雲撩亂撲燕山故鄉風物頻回首
同輩衣冠竟厚顏使節謾隨征雁遠宦情長似野鷗閒
黃灣綠水深千尺此日西風旅櫬還

送陳御史孟陽之官三河

幾年文墨侍彤闈
妙句曾看對御題
翠栢臺前聽雨漏
金蓮炬底立霜蹄
當時意氣青雲動
此日棲遲皂帽低
歧路相逢又相別
灤河煙樹冷淒淒

贈楊主簿時為金銀閘壩官天台人

寥落清秋老孟嘉
向風長是整烏紗
西江見說詩無敵
東郡誰憐髮有華
金壩晚飛湖上雨
巾峯晴漾海門霞
微官未遂清遊願
辜負仙槎幾樹花

黃河四月動官舟
河上梁山紫翠浮
馬頰餘波衝岸斷
龍門殘雪帶星流
熹微曙氣鄉心遠
颯遶涼風鬢影秋
遙憶釣魚洲渚上
幾番吟興負沙鷗

古河

蕭關之北黃河流
昔時禹蹟今成丘
荒碑苔蘚不辨色
古水蛟龍猶有湫
野人千載見清淺
海宇萬里無戈矛
明當作頌獻天子
高鑄寶冊垂鴻猷

出關

忘却看花上帝都出關猶記佩兵符龍歸古寺雲初定
鳥落寒灘水半枯萬古文章關氣運十年風雪老頭顱
憑將翠管三千牘換取黃柑二百株

冬至

朝來喜色動鍾山雲氣從龍香靄間官扇影搖春仗下
佩環聲散早朝還書祥謾有三千牘獻頌長違咫尺顏
已擬陰何同結社遍題新句老江關

思家

京華薄宦已沾巾寥落三年濟水濱冷雨青燈吟客夢
東風蓬鬢異鄉人雲濤渺渺滄江暮榆柳依依旅邸春
朋舊別來多野興故園應已賞芳辰

南昌鐵柱觀

琳宮石筍露峩云是千年此鎮妖方外羽衣能濟世
城中仙甃亦通潮蛟龍水底蟠金鎖雞犬雲間聽玉簫
行索已垂思點石祈靈壇上倚逍遙

十八灘

五城一別二千里孤棹重經十八灘拍岸怒濤雷噴薄
橫江亂石鐵巉岩天陰紮屋籠商軸夜冷蒼龍吼劒關
猶記平南諸將下樓船此地凱歌還

寄高彬 二首

與君夙有通家好堂上嚴親未白頭野寺花明春載酒
清溪月朗夜浮舟陶潛此日生歸思屈子長年賦遠遊
煙水五湖歸棹早為余開逕碧林幽

蟾溪溪頭春水生故人卜築茆堂清開門雨過芳樹綠

對酒風來幽鳥鳴我纏薄宦去鄉國君亦久客留天京
未知何日遂歸計重結漁郎鷗鷺盟

采石太白墓

冠屨何年墮世塵先生元是謫仙人春雲彩筆驚飛燕
暮雨滄江泣石麟牢落清名元不沒衰遲大雅竟難陳
脩然我亦狂吟客思殺風流賀季真

次黃州

日落放船鸚鵡洲漢陽烟白樹幽幽江豚數起浪花夕

野鶴一聲山水秋
帆影掠雲過赤壁
櫓聲搖月下黃州
何因散髮林臯下
得似蘇仙爛漫遊

望廬山 二首

扁舟夜泊潯陽岸
隱約香爐五老巔
紅葉天燈飛鳥外
白蓮僧社斷猿邊
蒼崖影合東林寺
銀漢光連瀑布川
亦有宗雷遺世想
千峯無路訪羣仙

東林佛閣倚岩堯
蘿逕逶迤傍石橋
松柏千章連左蠡
芙蓉萬疊倚層霄
琪花雪影江心見
蓮社天香世外飄

歸老倘酬仙賞願
籃輿寧待遠公招

至儲潭廟留題

五老峯微楚路分
贛灘猶禮洞庭君
行空鐵馬寒嘶霧
帶月蒼龍夜吼雲
瓊佩倩誰招
帝女桂漿聊復奠
靈氛
清吟寄遠成孤絕
思入滄江白雁羣

過岳州

渺渺孤舟江漢間
歲華搖落鬢毛斑
裁成方朔三千牘
博得瞿塘十二灘
峽口瘴深迷岳渚
洞庭風順過君山

無端又是重陽節起對黃花一破顏

巫峽秋懷

浙浙金風霄漢間火雲猶自繞巫山
雨餘神女收旌旆月朗明妃響佩環
萬頃波光人鮪甕一天秋色鬼門關
吟魂未向三巴斷尚逐東吳畫舸還

八陣圖連滌瀨堆永安宮下水縈迴
風雲舊蹟森猶列行在荒臺久已頽
鐵馬躍雲嘶凍雨木牛遺恨吼驚雷
英雄一去今千載殘照西風首重回

漢相祠西江水煙晚風平楚送歸船千重古錦雲端石
一帶空青峽裏天詩思每懷秋放鶴客心那更夜聞鶉
憑誰為寫高唐賦譜作朝雲蜀國絃

懷四川二首

蜀城風物冷淒淒馬上哦詩日向西雪嶺冰融春水綠
錦江花落子規啼卧龍祠廢碑橫草杜老堂空雨漲溪
回首勝遊成往事倚風吟斷意俱迷

草堂烟樹入青霄漢殿荒臺秀黍苗宇宙詩名今尚在

風雲霸氣未全消，寒星夜落支機石。
錦水春明駟馬橋，花柳舊遊今幾載。
西風蓬鬢影蕭蕭。

懷羅浮寄蕭鍊師

誤解蘭纓下彩峯，十年飄泊厭西東。
秋風楚塞塵隨馬，夜雨吳江浪打篷。
旅邸寂寥芳歲換，仙遊爛漫幾時同。
羅浮此日南薰轉，無數滂山荔子紅。

訪單孟雄不遇

不見龍灘單孟雄，欲從山薜覓行蹤。
門前烏柏經霜紫。

樹杪青霞著日紅蠟屐定過蝴蝶洞竹門長掩鷓鴣峯
桃花流水仙源近歲晚漁郎或再逢

曾氏耆壽翁詩

詞林每憶鄉園友曾是才名動縉紳觀國倦騎沙苑馬
幽棲長戴華陽巾芙蓉火足龍蟠鼎松樹天寒鶴近人
天上歸來今白髮泉南水竹願為鄰

懷萬修撰謫遼東二首

垂老謫官瀛海上驚聞嗚咽淚沾巾長憐偃蹇難堪俗

豈信文章解悞身賦鵬幾年留賈誼懷沙此日弔靈均
無勞更用悲萍梗見說皇家雨露勻

聞君遠謫三韓去萬里天風裂素衣聖世君恩殊未薄
畏途吾道一何微金蓮炬暗梅花落鴨綠江寒雁影稀
我亦漂流向滄海相思何處不依依

奉寄文淵學士吳公

翰苑摛文沐寵多遙聞近侍在鑾坡謹言屢進分香日
直筆常濡太液波入相內庭稱褚亮薦賢當路說常何

獨憐落職東遷客，遠道西風鬢欲皤。

懷朱太史芾宋舍人璫

誰憐飄泊向江關，獨倚長風憶妙顏。
老我黃塵三楚外，羨君華藻五雲間。
清時步武蜚聲蚤，晚歲逶迤奏牘閑。
鍾阜冶城蒼翠裏，何由更得共躋攀。

懷揭孟固

弱水神山路渺然，欲從何處問羣仙。
金門正合容方朔，滄海寧當老鄭虔。
白玉堂前秋月冷，紫薇花上曉風顛。

吟魂想挹天光近鳳尾游絲五色鮮

懷碧虛觀寄止菴蕭鍊師

四首

安期臺下蓋珠宮舊雨題詩紫翠中
五夜丹光虹貫日
四山松樹鶴呼風雲深洞口藏金母
歲久林楓化玉童
吟客遠遊仙子去錦桃春晚為誰紅

飛泉作雨落寒岩蓋闕凌天起翠嵐
禹柏千年青藹藹
堯蒲九節玉氈氈天游別我知誰共
世故撩人祇自慚
雲月舊盟應未冷可能相待解朝簪

平生最有滄洲趣一住三吳十二年愁逐亂雲生隱隱
夢隨孤鶴去翩翩尋真謾爾懷仙侶鍊藥憑誰授秘編
目斷南雲心欲絕祇今無計脫塵緣

前身恐是臨臯鶴長占烟霞物外交幾向滄洲乘野艇
更依蓬島結書巢千年果熟雲明樹五粒松寒露滴梢
為報羅浮蕭羽士好開蘿逕碧山凹

思家古河

古河烟草暗南天此去鄉園路幾千燕子來時春寂寂

海棠開後雨綿綿
滄江水遠吟詩社
綠渚花明載酒船
更憶故人王給事
愁來書破薛濤箋

悶興

無奈客愁愁不醒
誰憐新舍在南溟
佳人花底占烏鵲
令弟沙邊喚鷓鴣
庾嶺南來雲漠漠
清江東下雨冥冥
幾回吟罷空惆悵
謾對寒梅倒醪醑

觀海

海上蟠桃冬著花
蓬壺高處啟仙家
天寒霧雨籠鮫室

夜久星辰泊釣槎
神女步蓮珠
結鳳醉翁題竹墨
淋鴉連鰲未試任公手
欲借前籌紀歲華

戍遼渡海 二首

天風萬里噴洪濤
驚見神峯立巨鰲
絳節影搖龍伯國
繡幢光拂海鳧毛
浮空員嶠隨波長
繞石珊瑚出浪高
儻許從戎樹勲業
白頭歸路擁旌旄

清詩字字盡琅玕
水底蛟龍夜起看
未結柳船驅五鬼
又將蓬鬢犯三韓
靈筌降夕通仙語
海屋添籌紀歲闌

萬里封侯期可遂
春風笳鼓入長安

渡海呈同遊

同來文章諸鉅公
昔時作宦今從戎
不論西蜀與東廣
共渡北海期南風
將軍錦帶佩雙虎
左校寶刀藏一龍
明年奏凱答神貺
羽書歸奏蓬萊宮

沙門島 三首

白銀堆裏湧仙臺
歲晚登臨亦壯哉
妖蜃吐煙成海市
巨鰲擎石作蓬萊
金甍翠羽空中見
貝闕珠宮水底開

凱奏北旋應有日同遊俱是濟時才

立占滄溟碧玉簪
蜃樓高過百花香
興來落筆才無敵
老去從戎力尚堪
詩卷長年留海內
夢魂清夜繞江南
綸音早晚需前席
日望登萊使者駟

沙門滄洲洲上山
九河碣石高巉岩
雲來氣通巫女峽
月出光映藍田關
宮前彩鳳駕車下
祠底白龍行雨還
浴鳧飛鷺立沙際
疑是青瑣晨朝班

與謝縣丞坡山聯句

幾年來作交州客今日方登第一樓
謝萬頃煙波涵碧落四山雲氣藹清秋
孫瑤臺鶴駕排空下石室丹光傍

井浮謝蓬島依微天路近凌風直欲訪丹丘孫

送董文啓出宰江夏

委珮晨看拜玉除西遊真食武昌魚
王孫碧草秋無際仙掌金莖露下初
今日才名須卓茂當年詞賦說相如
登臨若對南樓月待爾賓鴻寄尺書

挽李樵雲

相國靈輦闕九京桓桓松柏表佳城風雲已際興王運
雨露偏傷孝子情一代文章遺汗簡千秋彛鼎勒勳名
平原賓客今誰在獨寫椒漿帶淚傾

西菴集卷六